

**Páwòlò cu wáràgà jì ndâ mbe kù
kili ta ɾè m̀ B̀ndi-Mb̀r̀r̀ g̀b̀
gbata
Gàlátì**

¹ Ǹǹǹo a ye tí Páwòlò, tí tú m̀ Jézù, náa àá táánò me ndâ 'duù ká bàkà ye tí tú m̀ Jézù lá. Jézù delè táánò tuu me ndâ 'duù jì ye máa ye g̀i tí tú m̀ ỳ ǹo lá. À káa 'dóo ỳ tí Jézù tí B̀ndi-Mb̀r̀r̀, g̀i je Mb̀r̀r̀ Buù tí mbe 'vala ỳ tí Jézù 'do g̀b̀ muu'dú wó, ká bàkà ye. Ǹǹǹo a ye ká kù cu wáràgà tí ǹo jì o.

² Ze ta ndâ ná'vindí ye ǹǹǹo mbe kù dù toko ta ye ǹo 'vee yo tí ndâ mbe kù kili ta ɾè B̀ndi-Mb̀r̀r̀ ta ndi g̀b̀ ndâ gbata g̀b̀ to Gàlátì 'dáá g̀i ma.

³ Ze kù 'deke tí ze jì Mb̀r̀r̀ tí ǹo tí Bu ndoo, delè tí Bu Mbe tí ndoo tí Jézù tí B̀ndi-Mb̀r̀r̀ ǹo, máa, ỳ 'v̀ bàkà nambeè jì yo, ỳ delè 'v̀ si yo 'v̀ dù ǹk̀i maa.

⁴ Àá táánò a Jézù ká 'vala ndoo 'do g̀b̀ ndâ v̀o i tí ǹo á kpónó muu to tí ǹo ǹo. Ỳ ká s̀i có ndâ v̀o i m̀ ndoo ta m̀r̀i wó go có m̀ Bu ndoo tí Mb̀r̀r̀.

⁵ À ùlù Mb̀r̀r̀ kpòò ya tí ! Go-i-tí-nò.

Gbèe Banga-Ngú-Có

⁶ Nje ye 'dèè gítì ña bà 'v̀s̀i muu yo g̀i. Ye ǹo yo g̀áá kù 'v̀s̀i muu yo 'do tí Mb̀r̀r̀ tí mbe tè'é tí yo 'do g̀b̀ nambeè m̀ B̀ndi-Mb̀r̀r̀, ta mò tí wálá, gítì 'b̀i ña tende banga-ngú-có.

⁷ Káa banga-ngú-có tí nò náa yo 'visì muu yo 'do tí Mbírì gítí nó me cèe có ta gbí ká tí nò lá. Ye 'dè có tí nò jì yo tacó ndâ 'bí vo-vò 'duù kù ñònòkò muu yo ta ba ñònòkò gbí Banga-Ngú-Có mì Bìndi-Mbírì.

⁸ Káa ye kpónó kù ci nó a yo gítí , máa, 'bí 'duù má 'dè có jì yo máa, 'bí ña banga-ngú-có mbe co tende 'do tí kpédélé Banga-Ngú-Có tí nó náa ze ma jì yo nó kuu tí , à má ma ña có tí nò kpétí káa 'duù 'do gbí òkò tí ze, wàlà kpétí káa basìlì mbe 'do tàrì, Mbírì bà waa có mítí 'duù tí nò, wàlà mítí basìlì tí nò ta ña wálá.

⁹ Ye bà 'dè gbí ndi có tí nò náa ye 'dè yee to kpónó nó jì yo káká'i: Ye máa, 'bí 'duù má 'dè 'bí ña tende banga-ngú-có bìndi Banga-Ngú-Có mì Bìndi-Mbírì nó náa yo 'di 'do gbí nje ye kùro gí nó, Mbírì bà waa có mítí 'duù tí nò.

¹⁰ Má éno, ye kpónó kù pèè a i ta bà peteke tàkòcò 'duù, wàlà ta bà peteke tàkòcò Mbírì? Ye kù pèè a i ta bà peteke tàkòcò ndâ 'duù? Go bà peteke tàkòcò ndâ 'duù má ká kuu tí ye kálásê, ye kùtáá bà dù tí bòò mì Bìndi-Mbírì wálá.

Na kpokèjì bà gí Páwòlò tí tú mì Jézù

¹¹ Ye kù 'dè có jì yo ta yúcó, ndâ ná'vindí ye tí ndâ mbe ùnje gítí Jézù go ye, máa, Banga-Ngú-Có mì Bìndi-Mbírì náa ye kù ma nó me có mì 'bí 'duù muu to tí nó gbaànjé lá.

¹² Ye 'di me 'do mì 'bí 'duù gbaànjé muu to tí nó lá. A delè me 'bí 'duù muu to tí nó káa ñbà jì ye lá. À káa 'dóó Jézù tí Bìndi-Mbírì ká 'dè jì ye.

13 Ye koṛo có máa, yo táánò 'di tàwo ye si ye kuu tèkè'dè gbí gèrè mì ndâ Jùdèyà kùro bà ùnje mì ye gítí Jézù nó gí. Zu bà mèèkè'i tí ndâ mbe ùnje gítí Mbírì ta rẹ̀ mì Jézù táánò tí ye njí'díí wálá. À ta o tí nò táánò gbí muu ye káa có bà 'bu ña ndú.

14 'Bí 'duù táánò gbí òkò tí ndâ ka ye 'viì Jùdèyà mbe ngaṛa ndii ye wálá, 'bí 'duù gbí òkò tí ndú delè mbe kpolo tí tàkùì mì ndâ ká gù ze go ye wálá.

15 Káa a Mbírì ta nambeè mì wó ká cu 'bì wó mítí ye si ye kálásê gbí yì nawu ye.

16 Yí giì túbà tí 'Viì mì wó Jézù ji ye, máa, ye ma có tí wó ji ndâ 'duù ñinó náa ndú me ndâ Jùdèyà lá nô. 'Do tí bándò bà túbà tí Jézù mì Mbírì ji ye nò, ye ya gí bà 'vee 'bí 'duù máa ye 'ví bàkà ta ña có tí nó a yè wè gbaànjé lá.

17 Ye delè ya gí Jèrùzàlémè tacó bà 'vee ndâ ká mbe nò tú mì Jézù tacó ndú 'ví túbà i tí nó náa ye 'ví bàkà nó ji ye lá. Ye ndii ká ta gbí muu ye ya gí Àrábìyà. Bìndi ye giì dele ndi ye giì gí Dàmásìkù.

18 Ye giì ya gí Jèrùzàlémè gí bà ñò Kéfà (Piyétòrò) a i bìndi ndoò ta'ô. Ye giì dù á mì ze ta yí ta sili muu'bì-nje vô.

19 Ta o tí nò náa ye ya tí gí Jèrùzàlémè nò, ze 'de tí ze ta ndâ 'bí tú mì Jézù lá. Ye ñò cuki káa Jákòmò tí nó tí ná'vindí Mbe tí ndoo nô.

20 Ye kù see a tí ye ji yo kùro Mbírì máa, có tí nó náa ye kù cu ji yo nó a yúcó.

21 Bìndi bà ñò Kéfà, ye giì njè nó 'do Jèrùzàlémè ya gí Síriyà, bìndi ye giì 'do Síriyà ya gí Silísìyà.

²² Gbí ndâ o tí nò 'dáá gî, ndâ mbe ùnje gítí Bìndi-Mbíṛì gbí ndâ gbata mì ndâ Jùdèyà 'dáá gî jé nò gbíro ye ta ɾo ndú lá.

²³ Ndú kù 'di káa có tí ye ta tù ndú cuki, máa, «'Dakò tí nó táánò mbe kù mèèkè'i tí ndoo nó kpónó a mbe ma yúcó tí nó táánò náa yí kù jè ta bà 'buuku muu nô.»

²⁴ Tacó énnò ndú gii ùlù Mbíṛì tacó tí ye.

2

Ndâ Páwòlò ta 'bí tú mì Jézù

¹ Ye bàkà a ndoo muu 'bì-nje nà'ò gbí nó mì ye náa ye 'do tí á Jèrùzàlémè nò, bìndi ye bà gii 'dò ndi kò ye mí kà. Ze ta o tí nò gbí nó tí nò ta Bàrànáà, káa ye delè gii bala Títò ta ye.

² A Mbíṛì ta o tí nò ká 'dè có ji ye máa ye ya gí Jèrùzàlémè. Ye mâ gii yee kà, ye gii ya gí mì ndâ kpo 'duù mì ndâ mbe ùnje gítí Bìndi-Mbíṛì á tà bèngì. Tacó wàa ze 'ví 'viiki gbí Banga-Ngú-Có tí nó náa ye kù ma ji ndâ 'duù ñinó náa ndú me ndâ Jùdèyà lá nó ta kpéetí ze ta ndú. Tacó wàa ye 'ví bàkà sé nèté mítí ye sínò lá.

³ Ta ndâ ɲa ñinó 'dáá gî, ka nó mì ye Títò, náa ze gí ta yí nó a Ìgìrìgì mbe ya gí gbí gázâ go ze lá, káa ndú yòòngò yí máa yí gí gí gbí tàkì mì ndâ Jùdèyà nò lá.

⁴ Muu ze ta o tí nò gii 'bità bà ba a i gbí có mì ndâ 'bí 'duù mbe bàkà tí ndú tí ndâ ná 'vindí ndoo mbe ùnje gítí Jézù go ndoo mbe gí gí mí ze. Ndâ 'duù tí nò pomboo tí ndú gí gbí òkò tí ze tacó bà ɾi ze, wàa ndâ yì 'ví 'di ta gbí nderè có tí nó náa ndoo tí ndâ mbe kù dù toko ta Bìndi-Mbíṛì zèè ta có gítí tàkì mì ndâ Jùdèyà kácá-kácá lá

nô. Tacó có mì ndú gbí muu ndú éno máa, ndoo dù gbí tàkìì mì ndâ Jùdèyà tacó wàa ndâ yì 'ví bàkà ta ndoo tí ndâ i mì ndâ yì.

⁵ Káa ye gii kpo tí mítí ndú gí. Maa ye bà ò mí to nò gbaànjé wálá. Ye bàkà go éno tacó wàa 'vèrè 'ví yuu tí mí gbí Banga-Ngú-Có ji yo lá.

⁶ Káa ye gii 'di 'bí ña tende có 'do mì ndâ 'duù tí nó ta rẹ ndú a «ndâ kpo 'duù» á kùro ndâ mbe ùnje gítí Bìndi-Mbíri nó gítí Banga-Ngú-Có tí nò náa ye kú ma ji ndâ 'duù ñinó náa ndú me ndâ Jùdèyà lá nó lá. Ye nì «ndâ kpo 'duù» mítí ndú me tacó máa bà dù ndú tí ndâ kpo 'duù á kùro ndâ 'duù a kpóló-kpolo có ji ye nò lá, tacó Mbíri njèè gbí òkò tí ndâ 'duù lá.

⁷ Ta bà 'dè ta yúco, ndú gii ò ni gí máa, Mbíri bàkà ye tí mbe ma Banga-Ngú-Có ji ndâ 'duù ñinó náa ndú me ndâ Jùdèyà lá nó, á go bà bàkà Piyétòrò mì wó tí mbe ma Banga-Ngú-Có ji ndâ Jùdèyà.

⁸ Tacó à káa gbèe Mbíri tí nó mbe je wotí ji Piyétòrò máa yí ma Banga-Ngú-Có ji ndâ Jùdèyà nó ká je wotí bà ma Banga-Ngú-Có ji ndâ 'duù ñinó náa ndú me ndâ Jùdèyà lá nó delè ji ye.

⁹ Ndâ Jákòmò, ta Piyétòrò, ta Jòvànì tí ndâ kpalà gálá mì ndâ mbe ùnje gítí Jézù gii 'vee 'bì ze ta Bàrànába bà-i-nò, tacó bà túbà máa, ze a ndâ ka nèté mì ndâ yì náa Mbíri bàkà nambeè ji ze, máa, ze ya gí bà bàkà nèté gbí òkò tí ndâ 'duù ñinó náa ndú me ndâ Jùdèyà lá nô, wàa ndâ yì 'ví bàkà nèté gbí òkò tí ndâ Jùdèyà.

¹⁰ Ndú gii nanaka muu ndú ká mítí có tí nó ta go tí ye gbí njembí ye nó, máa, mbí ze 'ví ò tí bà konì ndâ mbe yè mì ndâ Jùdèyà lá.

Páwòlò do míí Piyétòrò si Àndiyókì

¹¹ Ta 'bí o gbaànjé, Piyétòrò mà giì giì mí ze Àndiyókì, ye giì 'dè gbí bà lê tí ña i mí wó ji yí ká mí kùro wó, tacó bà lê tí ña i mí wó káká'i me i bà nguú-nguú lá.

¹² Tacó ta kùro bà giì ndâ 'bí 'dakò náa Jákòmò tuu ndú 'do Jèrùzàlémè giì mí ze Piyétòrò kú zò i ta ndâ 'bí ná'vindí ze tí ndâ 'duù mbe ùnje gítí Jézù go ze káa ndú me ndâ Jùdéyà lá nò. Ndâ 'duù tí nò mà giì giì gî, Piyétòrò giì biya bà zò i ta ndâ 'duù tí nó náa ndú me ndâ Jùdéyà lá nò gî, tacó yí kú ci gúku tí ndâ 'duù tí nó mbe kú nanaka muu ndú míí có bà ya ndâ 'duù tí nó náa ndú me ndâ Jùdéyà lá nó giì gbí gázâ.

¹³ Ndâ 'bí Jùdéyà ñinó gbí òkò tí ze nò giì tè gí tàkò ña i-nò tí nó náa Piyétòrò kú bàkà go i mí nuù-gú nuù-bè'dè nò. Ye mà giì zeke'o, ye giì ñò Bàrànába gbí ngo mí ndú.

¹⁴ Ye mà giì ñò máa ña i tí nó náa ndú kú bàkà nó me kpokèjì mí Banga-Ngú-Có lá, ye giì 'dè có ji Piyétòrò si mí kùro ndâ 'duù 'dáá gî, máa, «À kpétí nó káa wò tí Jùdéyà ká kú 'vala go i mí ndâ 'duù ñinó náa ndú me ndâ Jùdéyà lá nó, wò bà giì yòòngò ndâ 'duù ñinó náa ndú me ndâ Jùdéyà lá nó, máa, ndú 'ví 'vala go i mí ndâ Jùdéyà ta ña kèjì ngàyi?»

I mbe 'vala ña ndâ 'duù 'dáá gî káa bà tee njembí ndú míí Mbíri

¹⁵ Káa ndoo tí ndâ 'duù tí nó náa à jò ndoo tí ndâ Jùdéyà nó táánò kú koṛo có máa ndoo me ndâ mbe bàkà vò i, tí ndâ 'duù tí nó náa ndú me ndâ Jùdéyà lá nó lá.

16 Ta ndâ ña ñìnò 'dáá gî, ndoo tí ndâ Jùdéyà ñìnó mbe ùnje gítí Bìndi-Mbírì gî nó ñò ni gî máa, à me bà bàkà go ndâ có gbí tàkìì mì ndoo ká kú 'viindi nambeè gbí òkò tí ndâ 'duù ta Mbírì. Ndoò delè giì ùnje gítí Jézù tí Bìndi-Mbírì, tacó wàa bà tee njembí ndoo mítí wó nó 'ví 'viindi nambeè gbí òkò tí ndoo ta Mbírì. Tacó ẹ̀ 'bí 'duù jé náa bà bàkà go ndâ có gbí tàkìì mì ndoo 'viindi nambeè gbí òkò tí ndú ta Mbírì gî nó wálá.

17 Káa à má 'de ndoo tí ndâ mbe bàkà vò i ta o tí nó náa ndoo kú pèè ta bà 'viindi gbí òkò tí ndoo ta Jézù nó, gbí 'ví dù éno máa, Jézù a mbe sè kàngá mì tà mbu mì ndâ mbe bàkà vò i? Jéé lá!

18 Káa ye kpónó má 'dè éno máa, ye dele ndi ye gítí bà ọ̀ ndi tàkìì mì ndâ Jùdéyà go ñìnó táánò náa ye kú bàkà nó, gbí éno máa, ye kú kpò a có mì Mbírì.

19 Gbí có mì ye nó gbí 'bí ña kpokèjì éno máa, nètè mì ye káká'i ta tàkìì mì ze tí ndâ Jùdéyà wálá. Tacó Mbírì táánò 'visì kapí wó gítí ye gbí có bà ọ̀ ndi tàkìì mì ze mì ye.

20 Káa ye kpónó kú 'vala a i ta ẹ̀ mì Mbírì. Áá táánò gbì ze mítí njèèkpè mú ta Bìndi-Mbírì. Tacó éno, ye kpónó kú 'vala me gbí 'dóó ña kpokèjì mì ye lá. Ye kú 'vala a i gbí ña kpokèjì mì Bìndi-Mbírì. Ye kú 'vala a i ta bà tee njembí ye mítí wó tí 'Viì-mì-Mbírì, tí mbe ùnje gítí bà cì á muu ye tacó yí zè ye ñikì ma.

21 Ye bà biya nambeè mì Mbírì wálá. Tacó tàkìì mì ze tí ndâ Jùdéyà táánò má a i mbe bàkà ndoo tí ndâ tó 'duù mì Mbírì, gbí éno máa, nderè ku mì Bìndi-Mbírì wálá.

3

Ndâ có mì Mòze ta bà tee njembí mítí Mbírì

¹ A 'bí ña i ká gbí muu yo tí ndâ 'duù Gàlátì! A 'di ká je kó'dú yí gii ñonoko ta yo 'do tí có tí nó náa ye táánò 'dè jì yo ngbáràngà'i gítí bà gbì Jézù tí Bìndi-Mbírì mítí njèèkpè mù nó gî?

² Káa 'bí có ta go bá 'vee yo gítí tí ye a ñinó máa: Mbírì táánò je Bèrì mì wó jì yo tacó yo a ndâ mbe kpolo tí tàkìì mì ndâ Jùdèyà wèè, yí je jì yo 'do gbí có bà ùnje mì yo gítí Banga-Ngú-Có tí nó náa yo 'di nó?

³ Yo kù ñonoko tí yo éno tacó yè? Yo táánò 'bità bà 'vala go có mì Mbírì ta wotí mì Bèrì-mì-Mbírì. Káa à kpónó gbí muu yo a có bà gbo nje ta 'dóó wotí mì yo?

⁴ À wá nò, a cè gbí kò có mì yo gítí ndâ i tí nó mbe 'de yo muu Bìndi-Mbírì nó ká nò? A 'vèrè! Yo bà 'dè me ña có tí nò jì ye lá.

⁵ Mbírì kù je Bèrì mì wó jì yo sínò, yí delè kù bàkà ndâ seřè mí gbí òkò tí yo tacó yo a ndâ mbe kù bàkà go có mì Mòze wèè, yí bàkà jì yo éno 'do gbí bà 'di có tí nó táánò náa à ma jì yo nó?

⁶ Yo kořo muu yo gítí Àbìráámò gi. À cu mí gbí wáràgà mì Mbírì máa, yí táánò a 'duù mbe ùnje gítí Mbírì ta njembí wó gbaanjé, tacó éno, Mbírì gii bàkà nambeè jì yí.

⁷ Yo ñò ká gi! Ndâ 'duù ñinó kpónó mbe tee njembí ndú mítí Mbírì go i mì Àbìráámò nó 'dáá a ndâ 'viì mì Àbìráámò.

⁸ Tacó à cu mí gbí wáràgà mì Mbírì sàà gî, máa, Mbírì wúnò bà bàkà nambeè jì ndâ 'duù ñinó náa ndú me ndâ Jùdèyà lá nó 'do gbí bà tee njembí

ndú mítí wó tí Mbírì. Tacó éno, à gii cu Banga-Ngú-Có tí nó náa Mbírì 'dè ji Àbìráámò nó mí gbí wáràgà mì Mbírì, éno máa, «Ye bà cù dè ngo cù mítí ndâ 'duù muu to tí nó 'dáá gî ta rẹ̀ mì lo.»

⁹ Má éno, Mbírì bà cù dè ngo cù wó mítí ndâ 'duù ñìnó mbe tee njembí ndú mítí wó nó go i mì Àbìráámò nò, ká go ña nambeè tí nó náa yí táánò bàkà ji Àbìráámò nò.

¹⁰ Káa Mbírì bà ì njà mítí ndâ 'duù ñìnó mbe tee njembí ndú mítí bà ɾu ndi tàkìì mì ndâ Jùdáyà nò, go có tí nó náa à cu mí gbí wáràgà mì Mbírì máa, «'Duù má sè tù wó gítí ndâ có tí nó náa à cu mí gbí wáràgà mì Mòze gítí tàkìì nó 'dáá gî lá, ye bà ì njà mítí wó» nò.

¹¹ Má éno, kponje kpónó gítí có tí nó máa, bà ɾu ndi tàkìì mì ndâ Jùdáyà me i mbe njaanga wú 'do tí mìrì 'duù á kùro Mbírì lá nó wálá. Tacó à cu mí gbí wáràgà mì Mbírì éno máa, «'Duù ñìnó jáá kùro Mbírì nó kù 'de 'válá a i 'do gbí bà tee njembí wó mítí Mbírì.»

¹² Káa ndâ có gbí tàkìì mì ndâ Jùdáyà me go bà tee njembí 'duù mítí Mbírì lá. Tacó 'bí có kuu gbí wáràgà mì Mbírì éno máa, «'Duù ñìnó mbe kù bàkà go ndâ có tí nó gbí tàkìì mì ndâ Jùdáyà nó kù 'de 'válá a i 'do gbí ndâ có tí nò.»

¹³ Káa Bìndi-Mbírì sì muu ndoo 'do gbí njà tí nó náa Mbírì táánò ì mítí ndoo tí ndâ mbe ɾu ndi tàkìì mì ndâ Jùdáyà nó ta bà te du njà tí nò á bìndi ndoo. Go có tí nó náa a cu mí gbí wáràgà mì Mbírì, máa, «À má le ku 'duù mí nje mû, gbí éno máa ye tí Mbírì waa có mítí 'duù tí nò gî.»

14 Bìndi-Mbírì lì miṛi wó gí tà njà á bìn̄di ndoo, tacó wàa Mbírì 'vì bàkà ta nambeè tí nó náa yí ci Àbìráámò gítí nó jì ndâ 'duù ñìnó náa ndú me ndâ Jùdèyà lá nò. Delè tacó Bèri-mì-Mbírì 'vì gí gí muu ndâ mbe tee njembí ndú mítí Mbírì ta rè mì wó tí Bìndi-Mbírì go cí tí nó náa Mbírì ci nò.

Ndâ có mì Mòze ta cí mì Mbírì

15 Ndâ ná 'vìndí ye, ye kpónó bà 'dè có jì yo gítí 'bí ña i mbe kù bàkà tí gbí òkò tí ndoo ta o 'dáá gí: Ku má 'dè có mì wó gí, à waa tí ngo nje ku lá. À delè suu kò mítí kòcò ku lá.

16 Nògí, Mbírì táánò ci cí tí nò jì ndâ Àbìráámò ta 'vii bìn̄di wó. Yo kpolo tí yo máa, à cu mí gbí wáràgà mì Mbírì me «ndâ 'vii bìn̄di wó» lá. À cu káa gbèè 'vii, tí 'vii bìn̄di wó, gbí máa, Bìndi-Mbírì.

17 Káa có mì ye a ñìnó máa, Mbírì ci cí mì wó ta ndò 430 kùro có mì Mòze. Má éno, kpokèjì bà mò cí mì Mbírì mì có mì Mòze gí nje seè wálá.

18 I ñìnó tí i nderè nó me go i ñìnó náa à ci 'duù gítí tí i-nambeè nò lá. Káa Mbírì táánò ci Àbìráámò cí-ci máa, yì bà je i-nambeè jì yí.

19 Má éno, gbí nderè tàkìì mì ndâ Jùdèyà a yè, sé náa Mbírì ci Àbìráámò gítí i-nambeè gí nó? Nèté mì tàkìì mì ndâ Jùdèyà a bà túbà ndâ vò i mì ndâ 'duù jì ndú yee tí o bà gí 'vii tí nó mì Àbìráámò náa Mbírì ci yí gítí wó nò. Ndâ basìlì táánò ká gí ta tàkìì mì ndâ Jùdèyà 'do mì Mbírì jì Mòze, tí 'duù tí nó táánò mbe kù 'dòkò có mì Mbírì jì ndâ Jùdèyà nò.

20 Mbe 'dòkò có ta o 'dáá gî kù 'dòkò có a i gbí òkò tí ndâ 'duù, me gbèe 'duù lá, káa Mbírì káa gbaànjé.

Nderè ndâ có mì Mòze

21 Má éno, gbí có tí nò máa, ndâ có gbí tàkìì mì ndâ Jùdéyà ta cí tí nó náa Mbírì táánò ci ta Àbìráámò ta bà me mbè nó toko lá? À me éno lá! Tacó Mbírì táánò má je tàkìì mì ndâ Jùdéyà jì ndoo tí i mbe njaanga miṛi ndoo 'do gbí wú, tàkìì mì ndâ Jùdéyà bà 'vala ndoo gî.

22 Káa yí bàkà me éno lá. Tacó à cu mí gbí wáràgà mì wó tí Mbírì éno máa, vò i zogo ndâ 'duù muu to tí nó 'dáá gî. Tacó éno, 'bí 'duù náa Mbírì 'ví bàkà nambeè ta yí nó wálá, tacó ndâ 'duù 'dáá káa ndâ mbe bàkà vò i. Tacó éno, Mbírì giì ci ndâ 'duù máa, yì bà bàkà nambeè jì ndâ mbe tee njembí ndú á mítí Jézù tí Bìndi-Mbírì.

23 Tàkìì mì ze tí ndâ Jùdéyà táánò kùro bà gí Jézù da 'bò mítí kò ze gî. Tàkìì mì ze tí ndâ Jùdéyà táánò ẹre ze mí bà gbèe to yee tí o bà gí Jézù gí bà nìbà bà tee njembí mítí Mbírì jì ze.

24 Tàkìì mì ze tí ndâ Jùdéyà táánò go 'bí ọa i mbe kù kpolo tí ze yee tí o bà gí Bìndi-Mbírì, gí bà njaanga miṛi ze tí ndâ 'duù ñinó mbe tee njembí ndú mítí wó nó 'do gbí wú.

25 Káa Bìndi-Mbírì kpónó gí gî. Má éno, ndoo káká'i me gbí tàkìì mì ndâ Jùdéyà lá.

26 Tacó à kpêtí káa yo tí ndâ 'duù Gàlátì, yo kpónó 'dáá gî a ndâ 'viì mì Mbírì ta ẹrè mì Bìndi-Mbírì tí Jézù á 'do gbí có bà tee njembí yo mítí Bìndi-Mbírì

²⁷ Tacó àá táánò caka tí yo ta rẹ̀ mì Bìndi-Mbírì. Má ènò, yo kpónó je ndâ cè ña ndâ i mì Bìndi-Mbírì 'dáá mítí yo gí.

²⁸ Má ènò, 'bè kpónó gbí òkò tí ndâ Jùdéyà ta ndâ 'duù ñìnó náa ndú me ndâ Jùdéyà lá nó wálá. 'Bè gbí òkò tí ndâ bòò ta ndâ cèè 'duù wálá. 'Bè delè gbí òkò tí ndâ 'dakò ta ndâ niì wálá, tacó yo kpónó 'dáá gí a ndâ 'duù mì Bìndi-Mbírì tí Jézù.

²⁹ Káa yo má a ndâ 'duù mì Bìndi-Mbírì, gbí éno máa, yo a ndâ 'viì mì Àbìráámò, tí ndâ mbe i tí nó náa Mbírì táánò ci Àbìráámò gítí ta bà me mbè nò.

4

¹ Ye kù gii 'dè 'bí có ji yo éno máa, ta o tí nó náa ro 'viì olo lá nó, 'bè gbí òkò tí ndú ta i tí nó náa bu wó bàkà tacó tí wó nó wálá.

² Tacó à ta o tí nó kù kpolo tí ndú ta i mì wó nó só gí ká kpolo, yee tí o tí nó náa yí gí tí 'duù gí, bìndi bu wó bà gii mò bà i tí nó náa yí bàkà ta rẹ̀ wó nó ji yí.

³ Ndoò táánò 'dáá gí kùro bà gí Bìndi-Mbírì a ndâ i mì ndâ bààcì ta ndâ 'bí ña tende tàkìì muu to tí nò.

⁴ Káa Mbírì mà gii ñò o bà bàkà go cí mì wó náa yí ci nó 'viì gí, yí gii tuu 'dóó 'viì mì wó náa a jò yí a niì gí muu to tí nò. Niì tí nó jò 'viì mì Mbírì nò mí gbí tàkìì mì ndâ Jùdéyà,

⁵ tacó bà sì muu ndoo tí ndâ 'duù tí nó táánò mbe kù 'vala gbí tàkìì mì ndâ Jùdéyà nó, tacó wàa ndoo 'ví dù tí ndâ 'viì mì Mbírì.

⁶ Mbírì túbà jì ndoo máa, ndoo a ndâ 'viì mì yì ta bà tuu Bèrì mì 'Viì mì wó gí gbí njembí ndoo, tacó wàa ndoo 'ví nì ta «Bàbá, Bu ye» mítí yì.

⁷ Má éno, à kpónó a Bèrì-mì-Mbírì náa yí tuu jì yo nò ká bàkà yo 'dáá gí tí ndâ 'viì mì Mbírì. Yo kpónó káká'i me ndâ bòò lá. Káa Mbírì má bàkà yo tí ndâ 'viì mì wó gí, gbí éno máa, yí bàkà yo tí ndâ mbe i tí nó náa yí cí ndâ 'viì mì wó gítí nó gí.

Na bà kpolo có tí ndâ 'duù Gàlátì mì Páwòlò

⁸ Ta o tí nó táánò si yo nò Mbírì ni lá nó, yo a ndâ bòò mì ndâ 'bí ña i mì yo, náa yo kù nì mítí ndú a ndâ bààcì ta gbí ndú wálá.

⁹ Káa yo kpónó nò Mbírì ni tí Mbírì mì yo gí. Mbírì delè kpónó nò yo ni tí ndâ 'viì mì wó gí. Káa yo kpòò kù je mbí yo mítí ña ndâ 'bí i ñinó ta gbí ndú wálá, delè ta wotí tí ndú go wotí tí Mbírì wálá nó tacó yè? A yè ká gí ta go bà dù tí ndâ i mì ndú káká'i gí gbí njembí yo?

¹⁰ Yo kpónó gbí ñinó mò Mbírì gí nje seè gí. Yo ndí kù tee njembí yo kpolo ma a i mítí ndâ pì, ta ndâ o bà bàkà i jì ndâ ña 'bí bààcì mì yo.

¹¹ Na kpokèjì tí nó náa yo kpónó tí nó kù je mí gbí muu ye a bà koṛo có máa, ye táánò volo a nje ye ta bà ma Banga-Ngú-Có jì yo sínò.

¹² Ye kù 'deke a tí ye jì yo, ndâ ná'vindí ye, máa yo mèlè ndi ye á go bà mèlè ndi yo mì ye kpónó nó. Yo jé bàkà vò nambeè ta ye ta gbèè rì kùṛo lá.

¹³ Kpètí ta o tí nó táánò náa sé'i tii ta ye mí mì yo, bìndi ye gii 'de ta o bà ma Banga-Ngú-Có jì yo nó,

14 yo jé 'dè có ñónókó gítí ye lá. Yo delè jé kì zuù tí ye lá. Ta ndâ ña ñìnò 'dáá gî, bà pò mbe nò'o me có 'dì lá. Yo ta o tí nò te wiři mítí ye go bà te wiři mítí basìlì mì Mbírì mbe gî 'do gbírì. Yo te wiři mítí ye goolá ye ta o tí nò káa 'dóó Bìndi-Mbírì tí Jézù.

15 Cèréré tí nó táánò tí yo nó kpónó ya gí ngo? Áá táánò gbí ndâ o tí nò má 'dè có ji yo máa yo aaka ndâ ñjì ɾo yo 'do gbí kùkélè wàa yo 'ví kaa ji ye, yo bà bàkà ta kponje gítí wálá.

16 Káa ye kpónó gbí ngú ñìnó gí tí vóló-volo 'duù ji yo gî, tacó ye kù 'dè yúcó ji yo, wálá ènò gí?

17 Có mì ye a i ta ndâ 'duù tí nó mbe kù bàkà tí ndú máa, có tí yo kpolo mì ndâ yì ma nô. Ndú kù bàkà ènò me ta tó njembí ndú lá. Ndú kù pèè ta bà njèè gbí òkò tí ndoo gî, tacó wàa yo 'ví dù tí ndâ tó 'duù mì ndâ yì.

18 Bà bàkà có tí yo máa yo 'ví dù tí ndâ tó 'duù mì ye gbí tó kpokèjì ñìkì ma. Káa à 'ví dù me ká ta o tí nó náa ndoo ta ndoo bà gbèè to nó cuki lá. À delè 'ví dù gí tàkò a cèè nderè.

19 Ndâ 'viì mì ye! Ye kpónó kèjì gí bà kònò sé'i káká'i go bà kònò sé 'viì mì ñi ta o gó-káyì, yee tí o tí nó náa yo ùnje gítí Bìndi-Mbírì ta njembí yo gbaànjé gî.

20 Ndoò kùtàá má ta ndoo bà gbèè to, wàa ye 'ví ñò ta 'dóó có ñìnó náa ye 'ví 'dè ji yo nó, áá bà ñìkì tí ye ma. Káa à má go ña ñìnó kpónó nó, ye ñò 'dóó có bà 'dé-'dè mì ye lá.

Nò 'do tí ndâ Àjárà ta Sarà

21 À tí yo a go bà dù tí ndâ 'duù gbí tàkìì mì ndâ Jùdáyà? Yo 'di có tí nó gbí wáràgà gítí tàkìì mì ndâ Jùdáyà nó lá?

22 À cu mí gbí wáràgà gítí tàkìì mì ndâ Jùdáyà éno máa, àá táánò mì Àbìráámò a ndâ 'vii sósò'ò: nawu 'bí gbaanjé a jú i-sí-sì, bìndi 'bí a 'vii gbí yì nájú cèè 'duù.

23 Nii ñinó tí jú i-sí-sì nó gù jò káa cèè bà jò ndò, bìndi ndú gù jò ta nii ñinó tí nájú cèè 'duù nó a 'vii ñinó náa a Mbíri ká ci yí gítí wó nò.

24 Gbí cè tiri tí nò éno máa: Ndâ nii tí nó mì Àbìráámò sósò'ò nó a ndâ bà toko có tí nó náa Mbíri toko ta ndâ 'duù ta bà só nò. Rè nii ñinó tí jú i-sí-sì nó a Àjárà ta 'bá mì ndú á Gú Sínàyì. Ndâ Àjárà ta ndâ 'vii gbí yì wó 'dáá gí a ndâ i-sí-sì.

25 Nii tí nó tí Àjárà náa a 'vii yí míti Gú Sínàyì á 'bá mì ndâ Àràbì nó go gbata Jèrùzàlémè tí nó kpónó tí gbolò gbata mì ndâ Jùdáyà, náa ndâ Jùdáyà tí ndâ mbe Jèrùzàlémè 'dáá gí a ndâ i-sí-sì, bìndi gbolò gbata mì ndú tí Jèrùzàlémè delè káa i-sí-sì, tacó 'bí ña tende bà koṛo có mì ndú bìndi bà ru ndi tàkìì wálá.

26 Káa Jèrùzàlémè ñinó gbíri, tí nawu ndoo nó me i bà zogo ta tàkìì mì ndâ Jùdáyà lá.

27 Tacó à cu mí gbí wáràgà mì Mbíri éno máa,
«Dù ta pétékè tàkòcò lo,
ndí lo nii nó jé mbe jò 'vii lá nò!

Da 'dì ta líkí'o,
ndí lo nii tí nó jé mbe tala sé bà jò 'vii lá nò!

Tacó nii tí nó táánò tí kázá
náa 'dakò mì wó bè yí mí gí nó

bà jò ndâ 'viì me mbè ndii niì tí nó
náa 'dakò mì wó jé jee yí mí to lá nó gî.»

²⁸ Ndâ ná'vindí ye, ndoo kpónó 'dáá gî a ndâ
'viì gbí cí mì Mbírì go Ìzákò tí 'viì gbí cí mì Mbírì
ji Àbìráámò.

²⁹ Káa 'viì ñìnó náa à jò yí ká tí cèe bà jò ndò
nó táánò kù mèèkè'i tí 'viì ñìnó náa à jò yí 'do
gbí có mì Bèrì-mì-Mbírì nó, jé ká go ña i tí nó
kpónó nò.

³⁰ Káa à cu mí gbí wáràgà mì Mbírì gítí ña có
tí nò máa yè? À cu mí gbí wáràgà mì Mbírì máa:
Mbírì gii 'dè có ji Àbìráámò máa, «Mòkò ndâ jú
i-sí-sì tí nò ta 'viì mì wó nò gî. I mì 'viì mì wó nò
gbí mbèlè mì 'viì mì cèe niì tí nó wálá.»

³¹ À má éno, ndâ ná'vindí ye, ndoo tí ndâ 'duù
ñìnó mbe ru ndi tàkìì mì ndâ Jùdéyà lá nó me
ndâ 'viì mì jú i-sí-sì lá. Ndoò a ndâ 'viì mì cèe
niì.

5

Kpolo tí lo 'do tí bà dù tí bòò

¹ Bìndi-Mbírì táánò njaanga miři ndoo 'do gbí
tàkìì mì ndâ Jùdéyà tacó wàa nètè mì ndoo 'ví
du ta tàkìì mì ndâ Jùdéyà káká'i wálá. Má éno,
yo 'dò kò yo mí to tí kpoò, wàa yo 'ví dù tí ndâ
'dakò. Tacó wàa yo 'ví si 'bí 'duù 'ví bàkà yo tí
ndâ i mì tàkìì mì ndâ Jùdéyà káká'i lá.

² Má éno, kòcò ye tí Páwòlò ji yo máa, yo má
ùnje gítí bà ya gí gbí gázâ go i gbí tàkìì mì ndâ
Jùdéyà gî, gbí máa, nambeè mì Bìndi-Mbírì tacó
tí yo gbaànjé wálá.

³ Ye kpónó kù ci nó a yo káká'i, máa, 'bí 'duù 'do gbí òkò tí yo má ùnje gítí bà ya gí gbí gázâ mì ndâ Jùdáyà á bìndi có tí nó náa ye kù 'dè jì yo nó, 'duù tí nò 'ví o muu 'bí có gbí tàkìì mì ndâ Jùdáyà gbaànjé káká'i lá.

⁴ Ndâ 'duù ñinó gbí òkò tí yo mbe kù jè ta bà 'viindi nambeè gbí òkò tí ndú ta Mbířì ta bà řu ndi tàkìì mì ndâ Jùdáyà nó mò tí ndú 'do tí Bìndi-Mbířì gí. Ndú delè bè gbí nambeè mì Mbířì gí.

⁵ Káa à má gítí ndoo tí ndâ 'duù mì Bìndi-Mbířì, a Bèřì-mì-Mbířì ká 'dè có jì ndoo máa, ndoo bà 'de ndâ tó i tí nó náa ndâ tó 'duù mì Mbířì kù ù nó a i 'do gbí bà tee njembí ndoo mítí Bìndi-Mbířì.

⁶ Tacó ndâ mbe ya gí gbí gázâ go tàkìì mì ndâ Jùdáyà ta ndâ mbe ya gí gbí gázâ mì ndâ Jùdáyà lá 'dáá 'vii ká 'vii, náa ndoo má gbí nambeè ta ndâ Bìndi-Mbířì tí Jézù nò. Kpóló-kpolo có gbaànjé káa bà ùnje gítí Bìndi-Mbířì ta njembí ndoo gbaànjé, náa à kù ñò ni mítí banga nambeè gbí òkò tí ndoo.

⁷ Yo táánò kù 'di có mì Bìndi-Mbířì ta banga tí , káa a 'di kpónó ká kù volo muu yo 'do tí ?

⁸ Áá bà dù me Mbířì tí mbe tè'é tí yo ká kù volo muu yo lá.

⁹ Ndâ 'duù kù 'dè dú káa yúcó, máa, «Gbèe kìnì volo yâ.»

¹⁰ Káa ye bà ñò me mítí yo lá. Tacó ye ñò ni ngbárángà'i gí máa, ña nambeè tí nó gbí òkò tí ndoo ta Bìndi-Mbířì nò bà si yo 'ví kořo 'bí ña tende có wálá. Ye delè ñò ni ta kponje gítí wálá gí, máa, à kpétí má káa 'di wè ká kù ñònòkò muu, yo Mbířì bà waa có mítí wó gí.

11 Káa à má gítí kùùkpò dī ye, ndā ná'vindí ye, ye kùtàá nò má kpòò kù ma có bà ya gí gbí gázà mì ndā Jùdèyà jì ndā 'duù, a 'di kpónó ká bà mèèkè'i tí ye? À má dú káa yúcó máa ye kpónó ká kpòò kuu nje nèté bà ma có bà ya gí gbí gázà mì ndā Jùdèyà jì ndā 'duù, bà ma có gítí njèèkpè mù mì Bìndi-Mbírì kùtàá bà gí jì ye a i ta kpo-se-muu.

12 Áá kùtàá má go có gbí muu ye, má wálá wàa ndā mbe kù ònòkò muu yo 'do tí bà 'di Banga-Ngú-Có mì Bìndi-Mbírì, máa, ẹ̀ 'bí kpóló-kpolo i má a bà ya gí gbí gázà mì ndā Jùdèyà nò, 'ví ba kpuu ndú á gí tàkò bà waaka nje kù nò tí ndú nò kpèkù gí.

13 À má gítí yo tí ndā ná'vindí ye, Mbírì táánò tè'é tí yo a i tacó bà njaanga mīrì yo á 'do gbí tàkìì mì ndā Jùdèyà gí. Káa gbí bà tè'é tí yo tacó bà njaanga mīrì yo. Káa yo 'ví si bà njaanga mīrì yo mì Mbírì nò 'ví dù tí nderè bà legee mīrì yo gí tàkò có mì go ndā i muu to tí nó nò lá. Yí bàkà éno tacó wàa yo 'ví konì tí yo gbí òkò tí yo go i mì ndā mbe tó nambeè.

14 Tacó ndò có tí nó máa, «Zè 'bí ka lo nìkì go bà zè 'dóó tí lo nìkì mì lo» nó kili sè ndā có tí nó 'dáá gí.

15 Káa má éno lá, wàa yo má dù kù ka'vaka tí yo gbí òkò tí yo ta bà bàkà sé'i mítí yo gbí òkò tí yo go i mì ndā kàzà nó, yo 'bu nò a ɲa yo gí.

Ndā Bèrì ta ndā 'duù

16 Káa có mì ye gbí njembí ye jì yo máa, yo 'vala go có mì Bèrì-mì-Mbírì. Yo si bà 'vala go 'dóó có mì yo gbí njembí yo mí to.

17 Tacó i ñìnó ta go tí ndâ 'duù nó, go ta o 'dáá gî tí Bèri-mì-Mbíri wálá. Bìndi i ñìnó ta go tí Bèri-mì-Mbíri nó, go ta o 'dáá gî tí ndâ 'duù wálá. Gbí có tí nò éno máa, yo má kú 'vala go có mì Bèri-mì-Mbíri, kpokèjì bà 'vala yo go i mì ndâ 'duù nè gî. Tacó ndâ kpokèjì mì Bèri-mì-Mbíri toko ta kpokèjì mì ndâ 'duù lá.

18 Yo má kú 'vala go có mì Bèri-mì-Mbíri, có mì tàkìi mì ndâ Jùdèyà káká'i ta yo wálá.

19 Na ndâ i mì ndâ 'duù jé gîri tí lá. Go bà-nò-vò-ndô, ta bà bàkà gîlini, ta bà gbètèkè tí ndú go i mì ndâ nò,

20 ta ba te duù mítí ndâ 'bí tende i go bà te duù mítí Mbíri, ta bà bàkà go có mì ndâ mbe kó'dú, ta bà sogo tí, ta bà toko có lá, ta vò njembí, ta bà dù ta go ndâ tó i 'dáá ká gítí mîri 'duù, ta bà bàkà 'bè mì gbí òkò tí ndâ 'duù,

21 ta bà bàkà ndâ 'bí ña i mbe lè gî káká'i, a go bà tò kiì, ta bà sa ta pe, ta bà bàkà vò muu ta pe, ta bà bàkà ndâ 'bí ña i mbe ñikì lá. Ye táánò ci yo sàà á kùro gî. Káa ye kpónó bà ci ndi yo ká gítí gbèe có tí nò káká'i máa, ndâ 'duù mbe kú bàkà ña ndâ zu i tí nò náa ye 'deke ndú ji yo nò bà dù tí ndâ mbe zèè 'bá mì Mbíri wálá.

22 Káa nambeè mì Bèri-mì-Mbíri náa yí bàkà ji ndoo tí ndâ 'duù mì Bìndi-Mbíri a ñìnó máa, ndoo 'ví zè tí ndoo ñikì gbí òkò tí ndoo; máa, ndoo 'ví dù ta líkí'o tí ndoo; ndoo 'ví dù ta 'dé njembí ndoo; ndoo 'ví dù tí ndâ mbe du njembí; máa, ndoo 'ví dù tí ndâ 'duù ta nambeè ká gbí yì ndoo, ndoo 'ví dù tí ndâ 'duù; ndoo 'ví dù tí ndâ 'duù ñìnó náa àá bà nguù i ji ndoo gî;

²³ ndoo 'ví dù tí ndâ 'duù ñìnó ta njembí ndoo lèè; delè ndoo 'ví dù me tí ndâ mbe bàkà i gí tàkò có mì sé njembí lá. Ndoó má 'vala go có mì Bèri-mì-Mbíri nò, 'bí có gítí ndoo gbaànjé wálá.

²⁴ Ndâ 'duù mì Bìndi-Mbíri woo go ndâ i muu to tí nó 'do gbí njembí ndú 'dáá gî gbaa gî.

²⁵ Bèri-mì-Mbíri je ngú 'válá ji ndoo gî. Má éno, ndoo si yí 'ví túbà tó kpokèjì bà 'vala ndò ji ndoo.

²⁶ Ndoó 'ví si bà bàkà tí ndoo tí ndâ i mí to. Ndoó 'ví si bà go na-ngò vò i ji ndâ 'bí ka ndoo mí to. Ndoó delè 'ví si bà tò kùì gbí òkò tí ndoo mí to.

6

Ndoó te du téré mì ndâ 'bí ka ndoo

¹ Ndâ ná'vindí ye mbe, 'bí 'duù gbí òkò tí yo má bàkà i lè gî, yo tí ndâ 'duù ñìnó mbe kù 'vala ta wotí mì Bèri-mì-Mbíri nó 'ví túbà cèè kpokèjì ji yí ta pétékè có. Tacó bà bàkà vò i ká go bà ja 'duù mì gbàtàkà to. Káa yo wúnò má yaaka?

² Má éno à nìkì éno máa, yo bàkà go có mì Bìndi-Mbíri ta bà te koři vò i 'do pààpì ndú gî.

³ Tacó a ta o 'dáá gî káa ndâ ña 'duù ñìnó ta gbí ndú wálá nó ká kù ndunduuku tí ndú, máa, ndâ yì ma, ji ndâ 'bí ka ndú.

⁴ Má éno, 'duù má kù bàkà i ta ndâ 'bí ka wó, à nìkì máa yí 'viiki gbí kongbó lée kùro má kózò gi. Bà lê má kapí wó wálá, bìndi yí 'ví gii cè cè-'bì. Káa yí 'ví cè cè-'bì éno máa, yì me tó i gî; me éno máa, yì kpò ndâ 'bí ka yì gî nò lá.

⁵ Tacó 'duù 'dáá gî ká ta ña 'dóó du ká'i mì wó muu wó.

⁶ Ndâ 'duù ñìnó náa à kù ñibà Banga-Ngú-Có mì Bìndi-Mbíri jì ndú nó 'ví bàkà nambeè jì 'duù tí nò mbe kù ñibà i jì ndú nò.

⁷ Yo si bà eendi tí yo mí to. Tacó 'bí 'duù jé mbe eendi Mbíri ta 'bí gbèe ri wálá. 'Duù kù kili 'do gbí níjì mì wó káa ña i ñìnó náa yí ọ̀rò nò.

⁸ Má éno, 'duù má 'dè có máa, yì si njembí yì tí níjì, wàa yì 'ví je wotí a i gítí bà ọ̀rò ñjì ndâ 'bí ña i ñìnó mbe kù koni yì gítí bà bàkà ndâ i ñìnó mbe ñikì tí Mbíri lá muu to tí nó mí gbí, ndâ i tí nò ta ndòngbù o wúnò bà dù tí ndâ 'bìlì sè á tàkòcò wó. Káa 'duù má si a ndâ có mì Bèri-mì-Mbíri tí ndâ ñjì ña mì wó, bìndi yí 'ví ọ̀rò ndú mí gbí njembí wó, go bà ọ̀rò ndâ tó ñjì ña mì mbe jì níjì, 'duù tí nò ta ndòngbù o wúnò bà 'de a 'wálá ñìnó mbe cee lá nò.

⁹ Má éno, wo ndoo 'ví si bà co ta bà bàkà tó i mí to. Tacó ndoo má te kpo muu gítí yee bà ndòngbù, ndoo bà bè gbí bà 'de mboo tàkò wálá.

¹⁰ Má éno, kpokèjì gítí bà bàkà tó i má kuu mì ndoo, ndoo 'ví bàkà jì ndâ 'duù 'dáá gí. Káa ndoo 'ví bàkà jì ndâ ka ndoo mbe ùnje gítí Bìndi-Mbíri ndii sè ndâ 'bí 'duù 'dáá gí.

Ndòngbù kòcò Páwòlò jì ndâ 'duù Gàlátì

¹¹ Yo ñò ndâ kpo-kpò mbó wáràgà tí nó wálá gí? A ye ta 'bí ye ká kù cu jì yo.

¹² Ndâ 'duù tí nò mbe kù pèè ta bà yòòngò yo, máa yo ya gí gbí gázà go i gbí tàkii mì ndâ Jùdéyà nò, kù bàkà ndâ i tí nò cuki ká tacó bà mòò ọ̀rò ndú, delè tacó bà wu gbí ndâ i ñìnó náa ndâ 'duù kù ñò ta ọ̀rò ndú nò. Ndú kù bàkà éno cuki ká tacó

wàa à 'ví mèèkè'i tí ndâ yì á muu njèèkpè mû mì Bìndi-Mbírì lá.

¹³ Kpèti ká éno, 'dóo ndâ mbe kû yòngò ndâ 'duù máa ndú ya gí gbí gâzâ go có gbí tàkìi mì ndâ Jùdèyà nò ngbá kpolo tí ndâ tàkìi mì ndâ Jùdèyà lá. Ndú kû bàkà káa tí ndú tacó wàa yo 'ví mèlè ta ndi ndâ yì.

¹⁴ Káa à má gítí bà miṛi ye, 'bí i mì ye káká'i muu to tí nó náa ye 'ví wu gbí bìndi nderè bà cì Mbe tí ndoo Jézù tí Bìndi-Mbírì mítí njèèkpè mû nò wálá. Tacó ñinò a i ñinó mbe zi njembí ye 'do tí ndâ i muu to tí nó 'dáá gî nò.

¹⁵ Kpóló-kpolo có mì ndoo kpónó me ñinó máa, «'Duù ñinó ya gí gbí gâzâ go i gbí tàkìi mì ndâ Jùdèyà gî, káa ñizó ya lá,» nò lá. Cèe kpo có tí nó náa ndoo kpónó nje nó a ñinó máa, Mbírì suu ndi ndoo tí ndâ ngú 'duù gî wè?

¹⁶ Ye kû 'deke tí ye máa, Mbírì 'ví si ndâ 'duù ñinó mbe kû 'vala go có tí nó náa ye 'dè nó 'ví dù ñikì maa. Mbírì delè 'ví ñò yê ɾo ndú ta ndâ sè ndâ 'duù mì wó tí Mbírì 'dáá gî.

¹⁷ Ndòngbú có mì ye ji yo máa, 'bí 'duù 'ví pèè mbí ye káká'i ta rè 'bí i máa, gâzâ mì ndâ Jùdèyà nò, lá, tacó ndâ 'bèè kà muu Jézù kuu tí kû ye.

¹⁸ Ye kû 'deke tí ye ji Mbe tí ndoo Jézù tí Bìndi-Mbírì, máa, yí 'ví bàkà nambeè ji yo 'dáá gî, ndâ ná'vindí ye. Go-i-tí-nò.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa